



Ollsoláthair Ábhair TG4 2026 – Babhta 2

1

2

3

4

5

An dáta deiridh d'iarratais: 12:00 an 9 Meán Fómhair 2026

Conarthaí ó Dheireadh Fómhair 2026 ar aghaidh...

(Tá sé de cheart ag TG4 na dátaí seo a athrú más gá)

Tá córas coimisiúnaithe nua i bhfeidhm ag TG4 – TG4 eCoimisiúin. Chun iarratas a dhéanamh ní mór duit clárú ar an gcóras nua <https://ecoimisiuin.tg4.ie/>

FÍS EAGARTHÓIREACHTA

Cuirfidh TG4 fáilte roimh iarratais ón earnáil léiriúcháin neamhspleách ar bhabhta ollsoláthair léiriúcháin (Babhta 2) i gcomhair réimse leathan seánraí agus ardáin éagsúla.

Ba mhaith le TG4 ábhar misniúil, spreagúil, spraíúil agus uaillmhianach a chur ar fáil dá lucht féachana, ábhar a thugann léargas ar shaol, ar chultúr, ar spiorad, ar acmhainn grinn agus ar fhéiniúlacht na nGael ar bhealach barántúil, comhaimseartha agus físiúil ar gach ardán. Ábhar den chéad scoth atá fréamhaithe sa teanga agus i bpobal na Gaeltachta agus i bpobal na Gaeilge, a chothaíonn ceangal leis an lucht féachana, a spreagann comhrá agus ar díol suntais é ar líne agus ar an scáileán in Éirinn agus níos faide i gcéin.

Cuireann TG4 an lucht féachana i gcroílár gach ní a dhéanann sé. Beidh riachtanais, mianta agus nósanna féachana lucht féachana TG4 i gcroílár an ábhair a chraolfar. Cé go leanfaimid de bheith láidir i réimsí amhail faisnéis, ceol agus spóirt, tá fís shoiléir againn freisin lucht féachana nua agus níos leithne a mhealladh le hábhar atá siamsúil, spraíúil, dána agus sainsiúil agus a thugann 'Súil Eile' TG4 chun cinn ar bhealach comhaimseartha ar gach ardán.

Creideann TG4 i luach na Gaeilge agus gur buntáiste í ó thaobh na cruthaitheachta de. Tá TG4 ag lorg ábhair a thiocfaidh ón gcroí amach - ábhar atá fréamhaithe go nádúrtha sa teanga agus sa phobal, lena mbaineann uaillmhian ó thaobh na físiúlachta de, cur chuige eagarthóireachta láidir agus atá oiriúnach do gach ardán ón tús. Ba chóir d'iarrthóirí aird ar leith a thabhairt ar Pholasáí Teanga TG4 agus a chinntiú go bhfuil an cur chuige atá molta acu ag teacht leis.

FORBAIRT EARNÁLA

Tá forbairt earnála agus forbairt tallainne lárnach i bhfís fhadtéarmach TG4. Ní hamháin go bhfuil sé mar aidhm ag TG4 ábhar láidir a choimisiúnú, táimid ag iarraidh earnáil léiriúcháin chruthaitheach na Gaeltachta agus na Gaeilge a dhéanamh níos láidre, níos inbhuanaithe agus níos misniúla don todhchaí.

Tá sé mar aidhm againn an chruthaitheacht a chumasú, guthanna agus smaointe nua a thabhairt chun cinn, tacú leis an gcéad ghlúin cruthaitheoirí Gaeilge eile, deiseanna fáis agus forbartha a chruthú do chomhlachtaí léiriúcháin agus cultúr agus féiniúlacht na nGael a cheiliúradh le misneach, uaillmhian agus cruthaitheacht.

Ag teacht le straitéis TG4 agus le tosaíochtaí straitéise náisiúnta, beidh béim ar leith sa bhabhta ollsoláthair seo:

- Ar fhás agus ar inbhuanaitheacht comhlachtaí léiriúcháin Gaeltachta agus Gaeilge agus ar fhorbairt tallainne nua
- Ar an gcruthaitheacht a chumasú i measc phobal léirithe na Gaeilge
- Ar chnusaigh léirithe a chruthú agus a neartú i bpobail Ghaeltachta ar fud na tíre, go háirithe sna ceantair sin ina bhfuil deiseanna fáis agus forbartha le tapú
- Ar fhostaíocht inbhuanaithe a chothú agus a neartú sna ceantair Ghaeltachta
- Ar thacaíocht a thabhairt do chomhlachtaí a bhfuil fíis láidir chruthaitheach acu agus a bhfuil cultúr na Gaeilge lárnach ina gcuid oibre

Tá comhpháirtíocht agus comhoibriú lárnach i gcur chuige TG4 agus tá súil againn an meon sin a neartú san earnáil. Mar sin, chomh maith le hiarratais aonair, cuirtear fáilte roimh thairiscintí comhpháirteacha idir comhlachtaí a bhfuil a gcuid láidreachtaí féin acu agus a bhfuil saineolas ar leith acu, agus a neartaíonn an earnáil léiriúcháin ina gceantair féin.

CRITÉIR MHEASÚNAITHE

Measfar iarratais bunaithe ar chaighdeán eagarthóireachta, ar uaillmhian chruthaitheach agus ar acmhainn fhadtéarmach an togra agus an chomhlachta ó thaobh lucht féachana, forbairt earnála agus straitéis TG4 de.

ÁBHAR, CRUTHAITHEACHT AGUS LUCHT FÉACHANA

- Caighdeán, cruthaitheacht agus nuálaíocht an ábhair atá molta san iarratas
- A mhéid agus atá spriocanna TG4 i ndáil leis an lucht féachana mar chuid den iarratas agus a mhéid agus a léirítear tuiscint ar spriocanna fáis TG4 i ndáil le gach ardán.
- A oiriúnaí agus atá an t-ábhar eagarthóireachta do riachtanais TG4 agus na hardáin atá molta
- A chruthaithí agus a fhísiúil agus atá an t-ábhar atá san iarratas
- Polasaí Teanga, cur chuige teanga san ábhar a chruthaítear agus úsáid na Gaeilge sa chomhlacht

FORBAIRT AGUS INBHUANAITHEACHT COMHLACHTA AGUS EARNÁLA

- Léargas ar uaillmhian an chomhlachta don chonradh ollsoláthair chun gnó an chomhlachta a fhás
- Léargas ar an mborradh a chuirfear faoi fhostaíocht lánaimseartha inbhuanaithe i gcaitheamh thréimhse an bhabhta ollsoláthair
- Léargas ar fhorbairt eacnamaíoch i gceantair Ghaeltachta, go háirithe ceantair ina bhfuil deiseanna fáis
- Léargas ar fhorbairt foirne agus ar chumasú na cruthaitheachta agus na tallainne sa chomhlacht.
- Léargas ar chomhpháirtíochtaí straitéiseacha eile náisiúnta nó idirnáisiúnta an chomhlachta
- Cultúr sa chomhlacht sa thacaíonn le tograí cómhaoinithe agus comhléirithe

RIALACHAS, RIARACHÁN AGUS AIRGEADAS

- Cur síos ar struchtúir agus ar fhoireann an chomhlachta.
- Buiséad agus plean airgeadais soiléir; ag teacht le costas in aghaidh na huaire TG4
- Léargas ar rialachas corparáideach an chomhlachta
- Léargas ar dhea-chleachtais rialachais an chomhlachta
- Luach ar airgead poiblí

NA CONARTHAÍ OLLSOLÁTHAIR:

Táthar ag súil go dtosóidh na conarthaí ollsoláthair i bhFómhar 2026, cé go bhféadfadh siad tosú níos déanaí ná sin más gá. Beidh plean ábhair agus léirithe ag teastáil don chéad bhliain, chomh maith le fíis agus smaointe cuimsitheacha don ábhar do na blianta ina dhiaidh sin. Go ginearálta, mairfidh na conarthaí ollsoláthair trí bliana.

Tá ceithre réimse ollsoláthair mar chuid den bhabhta teoranta seo, bunaithe ar riachtanais ábhair TG4 nár comhlíonadh sa bhabhta roimhe seo. Braithfidh líon na gconarthaí a bhronnfar ar líon agus ar chaighdeán na n-iarratas, ar thoradh an mheasúnaithe agus ar riachtanais sceidil, ilardáin agus lucht féachana TG4. Ní bheidh dualgas ar TG4 conradh a bhronnadh i ngach réimse mura mbaintear na spriocanna amach.

Beidh buiséad bliantúil socruithe le haghaidh gach réimse den bhabhta ollsoláthair ar feadh ré an bhabhta. Ba cheart don chomhlacht léiriúcháin líon na n-uaireanta an chloig maidir le gach gné den ábhar (idir an ghné líneach agus an ghné ilardáin) a bheidh á soláthar acu a chur in iúl de réir an treoir thíos. D'fhéadfadh idirbheartaíocht a bheith idir TG4 agus an comhlacht ina leith sin.

Ba cheart don chomhlacht na réimsí faoin mbabhta ollsoláthair, a thugtar sa liosta thíos, a bhfuiltear ag déanamh iarratais ina leith a shonrú san iarratas. Ní bhronnfar níos mó ná dhá ollsoláthair ar aon chomhlacht amháin.

Le cruinniú a shocrú nó má tá ceisteanna agat maidir leis an mbabhta seo, cuir r-phost chuig maryellen.ni.chualain@tg4.ie nó laura.ni.cheallaigh@tg4.ie

IARRATAIS Á LORG AR AN MBABHTA OLLSOLÁTHAIR

OLLSOLÁTHAIR NUA DO CHOMHLACHTAÍ GAELTACHTA X 3

Leis an dá bhabhta Ollsoláthair seo, tá sé mar sprioc ag TG4 ar a laghad trí chonradh ollsoláthair a bhronnadh ar chomhlachtaí Gaeltachta taobh amuigh de Chonamara, ag teacht le cur chuige TG4 an earnáil léiriúcháin neamhspleách a neartú. Tá earnáil láidir i nGaeltacht Chonamara cheana féin agus tá sé mar aidhm ag TG4 an earnáil neamhspleách a fhás agus a fhorbairt ar fud na Gaeltachta. Cuirfear fáilte roimh iarratais ó chomhlachtaí Gaeltachta in aon cheann de na seánraí thíos.

1. FÍORASACH (50') X 1

Le craoladh: Lá i rith na seachtaine, i ndiaidh 9pm / ar Sheinnteoir TG4

Tá TG4 ag lorg ábhar faisnéise reatha uailmhianach a mbeidh féiniúlacht láidir eagarthóireachta i gceist leis don phríomh-chlársceideal agus d'ardáin TG4. Tá TG4 ag iarraidh ábhar comhaimseartha, géarchúiseach agus ábhartha a choimisiúnú a mbeidh fíis chruthaitheach láidir, scéalaíocht shainiúil agus pearsana láidre i gceist leis a spreagfaidh caint i measc an phobail agus a chuirfidh le súil eile agus le branda TG4. Tá TG4 ag lorg ábhair a chuidíonn leis an lucht féachana an domhan mórthimpeall orthu a thuiscint, a chuireann peirspictíocht agus comhthéacs ar fáil nó a chothaíonn fiosracht, comhrá agus inspioráid. Beidh na cláir fréamhaithe i bpobal na Gaeilge agus na Gaeltachta, ach le huaillmhian scéalta a mheallfaidh lucht féachana in Éirinn agus thar lear ar fud ardáin TG4.

Formáid: Tá TG4 ag díriú go háirithe ar chláir uair a chloig (50') leis an gconradh ollsoláthair seo. Fáiltítear roimh phacáistí ina bhfuil meascán d'ábhar, lena n-áirítear mionsraitheanna (2-4 uair an chloig) chomh maith le roinnt ábhar faisnéise digiteach (úr agus neamhspléach óna sraitheanna líneach) a chruthófar go sonrach do YouTube, do Sheinnteoir TG4 agus d'ardáin eile TG4. Ní mór athbhreithniú a dhéanamh ar ábhar faisnéise atá coimisiúnaithe ag TG4 le blianta beaga anuas lena chinntiú nach bhfuiltear ag moladh an ábhair chéanna arís.

Fad an chonartha ollsoláthair: Trí Bliana

Buiséad iomlán in aghaidh na bliana: €630,000

Líon na n-uaireanta atá le soláthar: 7 uair a chloig ar a laghad (líneach/ábhar léirithe digiteach nua)

2. CÚRSAÍ REATHA X 1

Le craoladh: Lá i rith na seachtaine, i ndiaidh 9pm

Tá TG4 ag lorg sraith cúrsaí reatha trína ndéanfar iniúchadh agus mionscrúdú ar scéalta nuachta, ar scéalta atá i mbéal an phobail agus a spreagfaidh caint i measc an phobail. Mar chuid den tsraith déanfar anailís ghéarchúiseach, chróga agus comhaimseartha ar scéalta nuachta agus ar na ceisteanna is mó atá ag dul i bhfeidhm ar phobal na Gaeltachta agus na Gaeilge agus ar mhuintir na tíre. Táimid ag lorg cur chuige láidir eagarthóireachta agus iriseoireachta a bhfuil guth agus féiniúlacht shainiúil aige, a chuidíonn leis an lucht féachana an domhan mórthimpeall orthu a thuiscint trí shoiléireacht, comhthéacs agus léargas, agus a

léiríonn luach láidir seirbhíse poiblí. D'fhéadfadh na cineálacha seo a leanas a bheith i gceist; iriseoireacht iniúchta, cúrsaí reatha bunaithe ar réitigh, mar aon le gnáthchláir cúrsaí reatha.

Bheadh cláir na sraithe oiriúnach le seachadadh ar ardáin éagsúla TG4, agus fáilteofar roimh chur chuige ilardáin. D'fhéadfadh gnéithe faisnéise agus formáidí eile a bheith i gceist leis na cláir, mar aon le gné iniúchta. Bheadh téamaí na gclár le haontú le TG4 roimh ré. Má tá ceisteanna agat maidir leis an réimse seo cuir r-phost chuig daithi.demordha@tg4.ie.

Fad an chonartha ollsoláthair: Trí Bliana

Buiséad iomlán in aghaidh na bliana: €360,000

Líon na n-uaireanta atá le soláthar: Ar a laghad 4 uair a chloig (40' nó 50')

3. SRAITH IRISE X 1

Le craoladh: Lá i rith na seachtaine roimh 8pm/ar an Seinnteoir

Tá TG4 ag iarraidh sraith irise chomhaimseartha reatha, 25 nóiméad ar fhad a chraoladh beo nó iarbheo trí oíche i rith na seachtaine ar feadh tréimhse 24 sheachtain in aghaidh na bliana. Beidh an tsraith lonnaithe i stiúideo den chuid is mó, sraith a mbeidh sé le braith uirthi go bhfuil sí á craoladh beo, a bheidh faoi stiúir láithreoirí a bhfuil pearsantacht láidir acu, ina mbeidh comhrá siamsúil, aíonna, míreanna VT rialta agus tuairisceoirí timpeall na tíre. Beidh de chumas ag an tsraith freagairt go nádúrtha do scéalta, d'imeachtaí agus do chomhráite na linne ar bhealach siamsúil, fuinniúil agus Gaelach fad a chothófar nasc láidir le pobail agus le réigiún éagsúla ar fud na tíre. Ba cheart cur chuige láidir físiúil, eagarthóireachta agus ilardáin a bheith mar bhunchloch ag an mbranda nua seo. Seo clár a mbeidh an lucht féachana ag iarraidh fillleadh air go rialta - áit a mbraithfidh siad go bhfuil siad mar chuid den chomhrá, go gcloisfear a nglór agus go neartófar an ceangal atá acu lena bpobal, lena dteanga agus le branda TG4.

Fad an chonartha ollsoláthair: Trí Bliana

Buiséad iomlán in aghaidh na bliana: €1m

Líon na n-uaireanta atá le soláthar: 24 sheachtain x 3 chlár (25 nóiméad) ina aghaidh na seachtaine

4. SIAMSAÍOCHT X 1

Le Craoladh: Ag an deireadh seachtaine/ i rith na seachtaine, roimh nó i ndiaidh 9pm/ar an Seinnteoir

Tá TG4 ag lorg formáidí siamsúla, spraiúla agus dána a bheidh dírithe ar lucht féachana leathan, formáidí a thugann ardán dár gcultúr Gaelach agus a bhaineann leas as agus a thagann le Súil Eile TG4. Sraitheanna siamsaíochta 25/50 nóiméad ar fhad atá uainn, lena n-áirítear seónna ardhuinnimh sa stiúideo nó ar an láthair nó ábhar siamsaíochta a mheallfaidh lucht féachana leathan agus teaghlaigh. Táimid sa tóir ar ábhar a chruthaíonn fuinneamh, áthas, agus sceitimíní dár lucht féachana. Is formáidí siamsaíochta atá á lorg againn sa chatagóir seo - seónna inarb í an tsiamsaíocht féin an príomhchuspóir, seachas formáidí siamsaíochta fíorasáí. Cuirfidh TG4 fáilte ar leith roimh smaointe a mbeidh cur chuige ilardáin láidir i gceist leo, ina mbeidh ábhar digiteach úr agus neamhspléach á fhorbairt go sonrach do na hardáin chun an lucht féachana is leithne a mhealladh.

Fad an chonartha ollsoláthair: Trí Bliana

Buiséad iomlán in aghaidh na bliana: €600,000

Líon na n-uaireanta atá le soláthar: Ar a laghad 8 uair a chloig (líneach/ábhar léirithe digiteach nua)

RIACHTANAIS IARRATAIS

Beidh foirm le líonadh isteach mar chuid den iarratas ar an suíomh nua [eCoimisiúin](#). Is féidir an t-eolas a bhaineann leis na riachtanais thíos agus aon eolas breise a chur ag deireadh an iarratais i bhfoirm pdf mar aon le naisc ar bith ar mian libh a áireamh.

Is gá na nithe seo a leanas a bheith san áireamh mar chuid den iarratas ar an mbabhta ollsoláthair:

- Cur síos ar an smaoineamh, ar an ton, uaillmhian, fíis eagarthóireachta agus ar an gcur chuige cruthaitheach a bhaineann leis don chéad bhliain, chomh maith le hachóimre ar bhliain 2 & 3.
- Uaireanta an chloig d'ábhar, idir ábhar líneach agus digiteach sa bhliain. Tá plean ilardáin ag teastáil do gach togra. Ní mór aon uaireanta digiteacha a bheith neamhspléach ar an tsraith líneach atá molta agus a bheith dúchasach do na hardáin dhigiteacha agus forbartha le sprioclucht féachana ar leith san áireamh.
- Amlíne léiriúcháin agus moltaí samplacha ar na cláracha/ an t-ábhar ilardáin don chonradh ollsoláthair ina iomláine

- Léargas a thabhairt ar an gcaoi a bhfuil an togra ag teacht le Súil Eile TG4 agus leis an méid atá á lorg don seánra áirithe sin
- Léargas a thabhairt ar an gcaoi a gcuirfidh an togra le branda TG4
- A léiriú go soiléir go dtuigtear an sprioclucht féachana ar a bhfuil an t-ábhar dírithe agus go dtuigtear an chaoi a meallfar agus a gcoinneofar aird an lucht féachana sin.
- Plean ilardáin agus cur chuige soiléir maidir le forbairt an ábhair agus maidir lena chur in oiriúint do na hardáin dhigiteacha
- An fhoireann chruthaitheach agus eagarthóireachta a bheidh taobh thiar agus os comhair an cheamara agus taithí ábhartha na foirne sin
- Ba bhreá le TG4 dá ndéanfaí láithreoirí agus rannpháirtithe nua a mholadh mar chuid den iarratas. Má tá tallann ar an scáileán i gceist, tabhair iad sin le fios chomh maith le nasc chuig a dtriail scáileáin mar chuid den iarratas.
- Cur chuige eagarthóireachta teangeolaíoch don léiriú - ní mór an cur chuige a úsáidfear sa chlár / sa tsraith chun ardchaighdeán, cruinneas agus saibhreas na Gaeilge a chinntiú a chur in iúl. Beidh comhairleoir teanga ó phainéal nua comhairleoirí teanga TG4 riachtanach le haghaidh gach togra.
- Cur síos ar an gcaoi a gcuideoidh an Conradh ollsoláthair le forbairt tallainne, scileanna agus cumas cruthaitheach sa chomhlacht, sa cheantar agus san earnáil.
- Plean maidir le caiteachas, fostaíocht inbhuanaithe agus forbairt sna réigiúin agus an tionchar a bheidh ag an gconradh ollsoláthair ar fhás an chomhlachta agus ar an earnáil go háitiúil
- Buiséad ar [theimpléad Buiséid TG4](#) Conradh ollsoláthair a bheidh maoinithe 100% ag TG4 atá i gceist. Beidh iarratas incháilithe má bhíonn sé faoin gcostas atá luaite.
-

Is é an 9/09/2026 @ 12:00 an dáta deireadh a nglacfar le hiarratais faoin mbabhta ollsoláthair.

Eolas Eile d'Iarrthóirí

*Caithfear na hiarratais a chur isteach go leictreonach. Mura bhfuil an comhlacht cláraithe, caithfear clárú ar dtús ar an suíomh eCoimisiúin <https://ecoimisiuin.tg4.ie/>, agus an t-iarratas a dhéanamh roimh an sprioc-am tríd an rogha, **Ollsolatháir 2026 – Babhta 2**, a roghnú ón roghchlár anuas. Tiocfaidh admháil chugat go leictreonach go huathoibríoch. Ní ghlacfar le hiarratais tar éis an sprioc-ama agus is iad na comhlachtaí féin a chaithfidh a chinntiú gur seachadadh na hiarratais.*

Má tá aon cheist agat faoin bpróiseas leictreonach seachadta, cuir r-phost chuig

Glacfar le hiarratas ar an mbonn go gcomhlíonfaidh iarrthóir na hoibleagáidí reachtúla iomchuí uile.

Níl dualgas ar TG4 glacadh leis an iarratas is ísle i bpraghas, ná le haon iarratas.

Beidh aon chonradh ag brath ar Dheimhniú Imreítigh Cánach ó na Coimisinéirí Ioncaim.

An tAcht um Shaoráil Faisnéise: Cuirtear iarrthóirí ar an eolas gur ceadmhach eolas a sholáthraítear a nochtadh don phobal faoin Acht um Shaoráil Faisnéise. Ba chóir d'iarrthóirí aird a tharraingt ar aon fhaisnéis íogair (más ann di) agus an chúis go bhfuil an fhaisnéis sin íogair a lua. Ní féidir glacadh leis nach mbeidh dualgas ar TG4 faisnéis a eisiúint, fiú más dóigh leis an iarrthóir gur faisnéis íogair í agus go bhfuil sin curtha in iúl do TG4.

Ní ann d'aon chineál ceangail – conradh ná aon chineál eile – go dtí go mbeidh conradh foirmiúil scríofa forghníofa ag nó thar ceann TG4.